

Ai 3 di avost
INTE DISCUVIERTE DI S. STIEFIN, PROTOMARTAR
Protetôr de Diocesi di Concuardie - Pordenon
Solenitât

San Stiefin, un dai siet diacuns de Comunitât apostolice, al fo il prin a testimoniar cûl sanc la proprie fedeltât a Crist. La sô passion e je contade intai Ats che lu presentin come om «incolm di gracie e di virtût» (At 6,8). La discuvierte des sôs reliquiis dal 415 e impresionà une vore il popul cristian che al slargjà la devozion dal sant intai contors. Une vore di glesiis a forin dedicadis al so non, comprendude la seconde catedrâl di Concuardie, dopo de distruzion probabilmentri da bande dai Uns.

Antifone di jentrade

Si son spalancadis denant di san Stiefin lis puartis dal cîl
e lui si è cjatât par prin te schirie dai martars
e cussì al trionfe in cîl coronât di glorie.

Si dñs Glorie a Diu.

Colete

A nô, ch'ò celebrin, Signôr,
la solenitât di chel ch'al à savût preâ anje pai siei persecutôrs,
danus la gracie di imitâ chel ch'ò stin onorant
e di imparâ a volêur ben anje ai nestrîs nemîs.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cûl Spirtu Sant,
par ducj i secui dai secui.

PRIME LETURE At 6,8-10; 7,54-60

O viôt i cîi spalancâts.

Dai Ats dai Apuestui

In chei dñs, Stiefin, incolm di gracie e di virtût, al faseve meracui e spiêi di chei grancj framieç dal popul. Alore un trop de sinagoghe, che ur disevin dai “sfrancjâts”, int di Cirene, di Alessandrie e altris de Cilicie e de Asie si meterin di mieç e a scomençarin a contindi cun Stiefin. Ma no rivarin adore di tignî teste a la sapience e al Spirt che lu faseve fevelâ.

Sintintlu, ur vignive sù la rabie e a crustavin i dincj cuintri di Stiefin.

Plen di Spirtu Sant, lui al cjalà sù fis viers il cîl e al viodè la glorie di Diu e Gjesù in pîts a la sô gjestre. Alore al disè: «O viôt i cîi spalancâts e il Fi dal om in pîts a la gjestre di Diu». Petant grancj berlis, si stroparin lis orelis e si butarin intor di lui; lu sburtarin fûr de citât e si meterin a clapadâlu.

I testimonis a poiarin i lôr vistûts dapît di un zovin di non Saul. E intant che lu claponavin, Stiefin al preave cussì: «Signôr Gjesù, cjol la mê anime». Po si pleà sui zenôi e al disè a fuart: «Signôr, no sta metiur in cont chest pecjât». E cun chestis peraulis, si indurmidi vie.

Peraule di Diu.

SALM RESPONSORIÂL Dal Salm 30

R. Signôr Gjesù, cjol la mê anime.

Slungje viers di me la tô orele:

anìn svelt a liberâmi;

viôt di jessi par me une crete che mi pare,

un ripâr là che nissun nol rive a cjapâmi. **R.**

Tes tôs mans o met la mê vite;

sfrancjimi, Signôr, Diu di peraule.
No vœi viodi chei ch'a corin
daûr di dius che no son nuie,
jo tal Signôr o ai metude la mê fede.
O vœi gjoldi cjantant il to boncûr. **R.**

Fâs lusî la tô muse sul to famei;
salvimi pal to boncûr.
Tu mi platis a l'ombre de tô muse,
lontan des palissis dai umign. **R.**

SECONDE LETURE Rm 5,1-5 **Si vantîn parfin tes tribulazions.**

De letare di san Pauli apuestul ai Romans
Fradis, justificâts pe fede o sin in pâs cun Diu midiant dal nestri Signôr Gjesù Crist. Midiant di lui o vin vude ancje la jentrade, pe fede, in cheste gracie che si cjatìn e si vantîn te sperance de glorie di Diu. No dome, ma si vantîn parfin des tribulazions, savint che la tribulazion e fâs nassi la pazience, la pazience une virtût provade, la virtût provade la sperance. E la sperance no lasse malapaiâts, pal fat che l'amôr di Diu al è stât strucjât tai nestris cûrs in fuarce dal Spirtu Sant che nus è stât dât.
Peraule di Diu.

CJANT AL VANZELI Cf. Sal 117,26.27

R. Aleluia, aleluia.
Benedet chel ch'al ven tal non dal Signôr;
e splent sore di vualtris la lûs de sô muse.
R. Aleluia.

VANZELI Mt 10,17-22

No sês vualtris che o fevelais, ma il Spirt dal Pari vuestri.

Dal vanzeli seont Matieu

In chêt volte, Gjesù al disè ai siei disepui: «Stait vuardâts dai oms: us consegnaran ai sinedris e us flagjeleran tes lôr sinagoghis; o sarês strissinâts denant dai governadôrs e dai rês par colpe mê, par ch'ò dedis testimoniance a lôr e ai paians. Se us consegnaran tes lôr mans, no stait a bacilâ di cemût o di ce che o vês di dî. Us sarà ispirât in chel moment ce che o varês di dî; parcè che no sês vualtris ch'ò fevelais, ma il Spirt dal Pari vuestri al fevelarà in vualtris.

Il fradi al consegnarà a muart il fradi, e il pari il propi fi; i fîs a jeveran sù cuintri dai gjenitôrs e ju fasaran murî. O sarês odeâts di ducj par colpe dal gno non. Chel ch'al varà tignût dûr fin tal ultin, chel si salvarà».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti ufrìn
tal ricuart gloriôs di san Stiefin
e conferminus in chêt fede
che lui al à testimoneeade cul so martueri.
Par Crist nestri Signôr.

Antifone a la comunion At 7,59

Intant che lu claponavin, Stiefin al preave e al diseve cussì:
Signôr Gjesù, cjol la mê anime.

Daspò de comunion

Diu, che inte fieste di san Stiefin
tu nus âs clamâts a vê part di cheste sante taulade,
memoriâl de muart di to Fi,
conferme in nô la vore dal to boncûr
e trasforme la nestre vite intun ringraziament che nol finìs plui.
Par Crist nestri Signôr.